

# e-BULETIN JSKM



**Pengalaman yang  
Mendewasakan**  
*Norazah Umar*

**Antara Menarik di dalam**

- Kolca Kuih Tradisional
- Egypt Trips
- Hebatnya Seorang Ibu
- Perisian Matematik untuk PdP
- Rindu yang Tiada Penghujung

**Edisi November 2023**

# PROGRAM JALINAN KASIH BERSAMA PERSATUAN SAHABAT KANAK-KANAK KANSER WILAYAH UTARA (FOCCAN) 2023



Siti Asmah Binti Mohamed

Pada 9 Jun 2023, telah berlangsungnya program khidmat masyarakat bagi tahun 2023 di bawah anjuran Jabatan Sains Komputer dan Matematik (JSKM) yang bertemakan jalinan kasih. Program jalinan kasih ini merupakan program khas bersama Persatuan Sahabat Kanak-kanak Kanser Wilayah Utara (FOCCAN). Kanak-kanak yang telah didiagnosis menghidap penyakit kanser ini dipilih daripada Friend Of Childhood Cancer Northern-M (FOCCAN) iaitu sebuah persatuan sahabat kanak-kanak kanser Wilayah Utara yang ditubuhkan khas bagi memberi sokongan kepada keluarga serta kanak-kanak penghidap kanser. Program jalinan kasih bersama kanak-kanak kanser ini julung kali diadakan oleh warga JSKM bersama beberapa staf dari perpustakaan Tun Abdul Razak (PTAR), UiTM Cawangan Pulau Pinang. Berkonsepkan “fun day”, perpustakaan Tun Abdul Razak (PTAR) telah dipilih sebagai lokasi program. Program ini antara lain turut dimeriahkan dengan kehadiran badut dan maskot Mickey dan Minnie Mouse sebagai memenuhi gimik perasmian, aktiviti-aktiviti serta sesi bergambar. Program jalinan kasih telah dirasmikan oleh yang Berbahagia Tuan Rektor Prof. Ir. Dr. Hj. Ahmad Rashidy Razali serta dihadiri oleh Yang Berbahagia Timbalan Rektor bahagian Penyelidikan, Jaringan Industri, Masyarakat dan Alumni iaitu Prof. Madya Ts. Dr. Kay Dora Abd Ghani dan juga koordinator jabatan, Ts. Dr. Rozita Kadar.



Seramai 20 orang kanak-kanak penghidap kanser dalam lingkungan tiga hingga 15 tahun ditemani penjaga masing-masing telah diundang ke program ini. Mereka yang terlibat dipilih sendiri oleh pengerusi persatuan FOCCAN iaitu Puan Maznah Tayib dengan diiringi beberapa ahli jawatan kuasa persatuan FOCCAN. Program ini bermula seawal lapan pagi dan tamat pada pukul dua belas tengah hari. Antara acara yang diadakan sepanjang berlangsungnya program jalinan kasih termasuklah aktiviti bersama badut iaitu permainan secara berkumpulan, persembahan magik dan aktiviti mengubah belon pelbagai bentuk. Permainan interaktif komputer turut disediakan oleh ahli jawatan kuasa penganjur program bagi menarik minat kanak-kanak dalam bidang teknologi komputer.

Objektif utama program ini diadakan adalah bagi merai dan menyantuni kanak-kanak kanser yang sedang berjuang melawan penyakit masing-masing. Pelbagai pengisian aktiviti yang menyeronokkan dilakukan bersama-sama kanak-kanak penghidap kanser dengan harapan dapat menggembirakan hati mereka disamping menyuntik semangat kanak-kanak ini dan penjaga ke arah menjalani kehidupan yang lebih sihat dan positif. Program ini juga merupakan salah satu usaha dan tanggungjawab sosial korporat (CSR) Jabatan Sains Komputer dan Matematik (JSKM) untuk mendekati masyarakat yang kurang bernasib baik seperti pesakit kanser. Pada masa yang sama, program ini juga merupakan salah satu KPI (Key Performance Indicator) jabatan bagi memenuhi perancangan strategik JSKM 2023.



Program khidmat masyarakat yang berkonsepkan “fun day” ini bertumpu kepada usaha menceriakan, mengembirakan serta berkongsi rezeki bersama kanak-kanak FOCCAN. Hasilnya, kanak-kanak FOCCAN sentiasa ceria dan gembira sepanjang aktiviti berlangsung. Semangat wira kecil yang ditunjukkan kanak-kanak ini juga amat luar biasa kerana mereka begitu positif dan bersemangat tinggi dalam melakukan pelbagai aktiviti menarik. Mereka petah berbicara, bergerak dengan aktif, ceria bergurau dengan keluarga, rakan sebaya serta mesra bergaul dengan jawatan kuasa penganjur program. Selain itu, program ini juga secara tidak langsung telah mewujudkan jalinan hubungan silaturahim antara warga JSKM khususnya dengan penjaga kanak-kanak kanser serta sesama ahli jawatan kuasa persatuan FOCCAN. Program jalinan kasih ini merupakan usaha terbaik warga JSKM dalam mendekati dan berkhidmat untuk masyarakat yang memerlukan di samping membina ukhuwah dengan pihak-pihak yang lain.

Secara keseluruhannya, program jalinan kasih yang dijalankan di UiTM Cawangan Pulau Pinang telah memenuhi keseluruhan objektif program. Program ini diperhatikan memberi impak yang memberangsangkan terhadap semua peserta khususnya kanak-kanak penghidap kanser, para penjaga, persatuan FOCCAN, termasuklah warga UiTM sendiri. Kanak-kanak juga amat teruja apabila dapat merasai suasana di dalam perpustakaan di universiti dan turut berbesar hati ketika diberikan pelbagai hadiah dan cenderahati. Mereka juga amat gembira ketika disajikan dengan aneka makanan seperti ais krim, bertih jagung, Mc'D Happy Meal disamping menerima hiburan oleh maskot dan badut yang didatangkan khas bagi program ini.

Selain daripada itu, sumbangan wang bernilai Tujuh Ribu Ringgit hasil kutipan sumbangan daripada warga UiTM telah disalurkan khas kepada persatuan FOCCAN. Pemberian sumbangan tersebut bertujuan mengurangkan kos tanggungan penjaga seperti pembelian barangan keperluan asas khususnya susu, lampin pakai buang dan keperluan-keperluan lain. Hasil kutipan sumbangan wang daripada warga UiTM adalah satu tanda prihatin yang menunjukkan bahawa masih ada pihak yang mengambil peduli dan berkongsi kasih sayang dengan kanak-kanak penghidap kanser disamping memberi semangat kepada mereka bahawa penyakit yang mereka hidapi ini bukanlah halangan untuk mereka meneruskan kehidupan.

Semoga budaya peduli dan prihatin dalam kalangan warga UiTM terus bercambah mekar dan memberi tauladan yang indah kepada setiap warganya. Kesimpulannya, program ini telah memberikan pengalaman dan pengetahuan baharu serta kesedaran mengenai penyakit kanser khususnya dalam kalangan kanak-kanak kepada pihak JSKM. Semoga segala sumbangan wang dan tenaga yang diusahakan dalam menjayakan program ini diberkati Allah.